



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tiryimyim@aolima



tir yimyim

TAPAK 8

Taruba ita PM Modi-i Brunei aser Singapore na semdangtsü

US Open nung Van de Zandschulp-i Alcaraz tsükdaktsü



VOL. XXI ISSUE NO. 318 (ADOK 318) DIMAPUR

KÜPTOKNÜ (SATURDAY)

LUROI (AUGUST) 31, 2024 ₹ 5.00

Dzüdza bridge anasa anentsüh atema metetdaktsür

Dimapur, August 30, 2024 (TYO): Sechü Zubza kübok Dzüdza bridge anasa NH-29 lenmang tera lapokogo saka mapa tiptema inyaksü atema anogo asemnü atema tenokdangba kar agütsüogo. August 31, 2024 nungi September 2, 2024 anepdang 6:00 ako nungi aonung 7:00 ako tashi National Highway nung iba

lenmang shibangtsü ta Kohima Deputy Commissioner Kumar Ramnikant IAS-i ashi. Ajisüaka, item anogotem aonung 7:00 ako nungi anepdang 6:00 ako tashi garitulum senzüsü melatsü saka bus amala passenger garitem mesenzüdaktsüsü ta Kohima DC-i tanü sangdong ka nung ashi.

Advisor Keoshu-i DYRS Nagaland App sayatsü

Kohima, August 30, 2024 (TYO): Youth Resources & Sports Advisor S. Keoshu Yimkhiung-i Hokolbarnü DYRS Nagaland App sayatsüogo.

Advisor Keoshu-i DYRS conference hall, Kohima nung App sayatsü. "Iba App ajanga department nung ketdangsurtem aser staff tsüingda amalitepa tajungba alitsü" ta pai ashi.

"Department nung ketdangsurtem aser staff ajaki App amshitsü nenshir" ta Keoshu-isa ashi.

"Department nung director aser staff-i App yanglutetba atema tenüngsang agütsü aser iba ya department renloka aotsü nükjiding nung inyakba mapa ka lir" ta YRS Secretary, Anthony Ngullie-i ashi.

Paisa department nung inyaker ajak dang App amshitsü ayongzük.

"YRS advisor Keoshu lenisüba kübok department

tashitaitba küma arur. Iba App ajanga Nagaland nung sporting ecosystem nung teyari tulu angutsü imlar" ta YRS Director Kethosituo Sekhose-i ashi.

Iba App nung features asem lir- Attendance (ketdangsur aser staff ajaki iba App nung mashii mapang ka nung attendance asütsü). Department sasep nung maparen balala inyakba text report aser instant photographs ajanga update asütsü. Sorkar nungi district officers dangi yoktsü atema aruba sangdong balala lemsateptsü.

DYRS App ya Google Android system ajanga certify süogo aser Apple App store nung safe security atema certify süogo ta Director Sekhose-isa ashi.

"September 1, 2024 nungi department nung ketdangsur aser staff shiai iba App amshitsü imlar" ta App developer Rishav Sethi-ia ashi.

Nagaland Government School Students Meritorious Award agütsü

Dimapur, August 30, 2024 (TYO): Directorate of School Education (DoSE)-i August 30, 2024 nü Nagaland Government School Students Meritorious Award agütsüogo.

Morung Conference Hall, DoSE nung iba sentong agi aser School Education & SCERT Advisor Dr. Kekhrielhoulie Yhome-i tetushi süa jaoker ka ama shilem agi.

Takok anguba ya kaketshirtem dang masü saka tesayurtem dena lir kechiyong tesayurtemi pei tajungtiba agüja aser kanga meranga kaketshirtem sayutet" ta Advisor, Dr. Yhome-i ashi.

"Nagaland nung sorkar school 1,939 lir aser state kübok kinük ajaklen lapoka lir. Nagaland nung education system tajungba kümdaktsüsü atema sorkar school tem nung tesayur

tajungtem anioka lir. Ajisüaka sorkar school tem azüngertem ya sensakertem ta nisungtemi bilemba atema teuung raksar, asenoki iba tangatetba ya melentsüla" ta pai ashi.

Department-i akokba tashi education system ajungkettsü meranger aser iba atema sorkar school tem nung free quality-education agüja arur. GPS, GMS, GHS aser GHSS nung admission aginüa raktepba mapang ka yakta arutsü ta Dr. Yhome-isa ashi.

Paisa tesayurtem dang school nung tesentaktep tajung yanglutsü ayongzük aser September 5, 2024 nü Students' Health Card (SHC) sayatsü osang lemsatetp.

"Sorkar school tem nung kaketshirtem ajungmesotsü atema 2023 nungi iba sempet agütsür" ta DoSE Principal Director,

Thavaseelan K, IAS-ia ashi.

Sempet angurtem:

HSLC: Khushi Gupta (GHS, Chandmari); Nambagwangle Haining (GHSS, Jalukie) aser Shethilu Medeo (GHSS, Pfutsero.)

HSSLC Arts stream: Ilamgual (GHSS, Chumoukedima); Biseli Sangtam, Mayangnokcha GHSS, Mokokchung) aser Chujai P, (Bautüing GHSS, Longleng).

Commerce stream: Sony Kumari Sharma (Mayangnokcha GHSS, Mokokchung); Anmol Kumar Jha (Rüzhühkrie GHSS, Kohima) aser Kedoni Nakhro GHSS, Jotsoma).

Science stream: Sungtinen Longkumer (Mayangnokcha GHSS, Mokokchung, Julu Pojar (Rüzhühkrie GHSS, Kohima) aser Aosenla (Mayangnokcha GHSS, Mokokchung).

Western Sümi Hoho-i Dy. CM TR Zeliang o meyiptsür

Dimapur, August 30, 2024 (TYO): Deputy Chief Minister T R Zeliang-i Assembly Session nung Zhadima adena Capital Bypass road yangluba mapang menuba indang ashiba atema Western Sümi Hoho (WSH)-i o meyiptsüogo.

Niuland nung ali atema mangatetep aliba ajanga iba lenmang meyangluteter ta TR Zeliang-i shia liasü.

Dy. CM Zeliang-i Niuland

kübok yimtsüing asem ali melen sen meshi ta ashi saka shitakba nungbo yimtsüing ana dang liasü. Ajisüaka WSH-i tiyongtsü nung ia jembitepa iba ken o angatetep ta Media Cell WSH-i ashi.

TR Zeliang-i ali mangatetep ken o ajanga menur ta ashi saka WSH-i yaritepa olemtepa arudang ali kiburtemi sen meshiba meyiapa agiogo ta parnokisa ashi.

Yamaji süaka iba mapatong anendaka lir anungji onoki Dy.

CM dang pai jembiba olen meyiapa agitsü aser sendaktepa alirtemi mapa tajung inyakba agizüktsü mepishir ta WSH-isa metetdaktsüogo.

Capital Bypass road ya tekaratiba nung yangluzükba ajanga Dimapur aser Kohima tsüingda senzurtem aser talisa tzüingluruwa mongpu nung senzusenbongertemi timtem kangabo majurutsü imlar, ta parnokisa ashi.

Longsa lushi süia Tuensang-i aoba lenmang anentsüh agi anenbang; anogo ishinü gari kata mejajateti okrongtep

Mokokchung, 30th Aug (TYO): Mokokchung nungi Longsa lushi ajangba Tuensang lenmang ya talisa mei mapang kodanga küma malir. Tzünglu arura anentsüh agi lenmang ajak anenbanger aser tsüngküm nungbo lenmang majungba den auyi agi tejaja majung nürtem timtemer. Iba lenmang nung jajartemi dang tali tejangja metettsü.

Iba den külemi ano Dikhu (Tzüla) apu aser Tzütsüing (Chijung) apu ya kanga tejen kümer asünung mapang shia raksaben raksar. Tasen yanglu temsür sünung meyanglur aser tang aliba apu yabo kodang ang raksatsüar ashitsü makok aser iba ama apu nung gari jajatsübaji lendong lir. Lendong tulu ka ajurur külen ang yanglutsüba asü masüar. Joko iba ya küm talangka sarkari merepranger.

Longsa lushi ajanga senzüba Tuensang lenmang ya Longsa yimer aser Tuensang district pur atema dang masü saka yangi Zunhebotto district kübok Suruhuto range pur asoshia taküm lenmang lir.

Iba lenmang nung talisa Dikhu apu o Longsa-i atuba lenjem na



Mokokchung DC, Thsuvisie Phoiji aser Mokokchung Sr. SP, Vesupro Kezo nadi anir DDMA telok kadi NH 202 14 Km nung anentsüh aluba tesem semdangba mapang tangokba noksa nung angur. (Noksa: DPRO Mokokchung)

tsüingta ya tzüingluruwa mapang anentsüh agi lenmang aiben anenbanger alir. Iba tesem ya Longsa lushi nung asünung, aiben Longsa Council aser Longsa nunger kija, kibong aser telok balalai angati nübu aser rongsen tenla-a yangluba aiben social media balala ajanga ngua arur.

Tawa Dikhu apu o Longsai atuba lenjem tsüingta talisa tesem ana nung anentsüh tulu aluba ajanga anogo ishinü (pungu shi) lenmang ajak nembanger raliwalir/khu abenba gari kata

mejajateti anendener nürburtem timtemba osang angazüker.

Iba ama mapang Longsa yimden aser nürburtemi tanü tashi Mokokchung - Tuensang NH 202 lenmang nung anentsüh tesem anasü nung kanga mejungi alua gari den passengers-tem tim metemdaktsüsü asoshi akokba lenmang balala nung yaritepa arudar, ta iba osangbeneri Longsa yimsüsür ka den jembidang pa metetdaktsü.

7th Aug., 2024 nungi Dikhu apu anasa anentsü (mudslide) alua anogo shia contractor den

tongtepratepa gari-tem akokba tashi tim metemdaktsü inyakdakja aliba mapang, ano Longsa lenjem anasa ali atemzüka (sink asüba) aiba ajanga kenüa metitemi iba tesemji nüka aser contractor-ia temulung agüja garitem moteti aliba JCB (backhoe) teyari ajanga atsüteta yokli asü. Yamaji contractor den yaritepa tanen makai inyaka alidang, tia maka 27th Aug, 2024 nungibo lenmangji kanga mejungi gari tila dena mejajatettsüsa kümatok. JCB anir arua akok tashi atsüteta yoktsü merangaka

mokoki gari ajak anendena yangji aliba passengers-tem yaatzüra aliba mapang, külem yimsüsür Opanglemba GB par kibongi nisung 250 shi chiyungdaktsü, ta yimsüsürisa ashi.

Takok tashi Longsa yimden duty noktaka nübusa nübu tsüka tanü tashi department, contractor aser district administration den taka amteper maparen ajak nung anogoshi yimsüsür nübu ter tama nübu tsuka yaritepdar, ta paisa shisem.

Tanü Aug 30 nü Mokokchung DC, Thsuvisie Phoiji, aser Mokokchung Sr. SP, Vesupro Kezo, nadi anir District Disaster Management Authority (DDMA), Mokokchung nungi telok kadi NH 202, 14 Km nung anentsüh aluba tesem semdang. Anentsüh tulu arua lenmang rangben anenba ajanga raliwalir aser khu abenba gari-tem anogo 5 shi yangji anendener liasü. DDMA ajanga yangji anendena aliba khu abenba gari 60 tama driver, yariteper, passenger-tem nem tang nüngdakba teyari (immediate relief) agüja liasü, ta Mokokchung DPRO osang ka ajanga metetdaktsü.

(Maneni tapak 8 nung...)

Tzüsapang Sector kum 25 ajungba jubilee benjungmung sentong agi



Tzüsapang Sector kum 25 ajungba Silver Jubilee nungo kaket tongti tesemdanger Advisor, Law & Justice, Land Revenue, T.N.Manen IAS(Retd) ajanga sayatsüdang tangokba noksa.

Mokokchung, August/Luroi 30 (TYO): Mokokchung yim kübok aliba Tzüsapang Sector kum 25 ajungba Silver Jubilee benjungmung sentong August 30 nü Tzüsapang Community Hall nung "Telungjem Ajanga Tejakleni" ta asiba omen nung amendaker kaogo.

Tanü iba jubilee sentong nung tongti tesemdanger Advisor, Law & Justice, Land Revenue, T.N.Manen IAS(Retd) ajanga jubilee nungo kaket sayatsü aser iba sülen tongti tesemdanger ama pai mapang tatsüka agia jembidang akhi mapang nung Aor-o-Aor na leptep, jubilee ya asenoki memetet liasü, yim ka nungi yim kati moteti aliba mapang

America nunger missionary-tem aruagi asenok nem yimsü tajung amangdakja, asenok nüchi tia-i aniteta yimjung angatetdakja asenok yim ka nungi kati otet ta ashi.

Alima melenshia aoba ajanga nüburtem tangatetba dangi aruagi leptep tsüngtep samaogo, anungji jokola alima renloka odaktsütsü asoshi tangatetba alitsüla, Tzüsapang sector-ji Mokokchung yim nung lir, Mokokchung town ali kibur yim ka ama Mokokchung renloka aotsü asoshi nüburtem sadem sadema litettsüsa ajak den teka amtepa alitsü kanga dang tongtipang lir, ta Mokokchung town ali kibur ayongzüka tongti

tesemdangerisa ashi. Advisor T.N.Manen-isa Tzüsapang sector-ji Mokokchung town anasa aser ajaki linütsü tesem ka lir, anungji jubilee sülen ano nüburtem tiptema litettsüsa tali dang temeimtep aser telongjem nung alitsüla ta adenshia aliba Jubileemonger ayongzüka liasü.

Sentong nung Tsüngrem temoatsü aser lenisüba jazüka Tzüsapang Baptist Arogo Pastor Rev. W.Supong ajanga sarasadem aser Tzüsapang Sector Committee Chairman Wb. Imowati ajanga tarur pela agizüka jembiba den Mokokchung Village Council Chairman Wb. Mapu Longkumer, Convenor Seven Sectors Telongjem, Er. Imkongakum Longkumer parnokkia tepela o aser melepzüng o jembia liasü.

Iba sentong nung Editorial Board Convenor Wb. Lima Lemtur achayangba nung nungo kaket sayaba mapang agi aser tatem nung Alisüngküim Baptist Fellowship Pastor Wb. I.Asang Jamir ajanga sarasadem aser Planning cum Fund Raising Committee Convenor Wb. Tongpangyanger ketdangsüba nung iba sentong agia liasü.

DGC nung NCAP indang awareness campaign tenzü

Dimapur, Luroi/August 30 (TYO): Green Campus Committee, Dimapur Government College (DGC) ajanga District Administration, Dimapur den lungjemer Seminal Hall, DGC nung August 29, 2024 nü National Clean Air Programme (NCAP) indang nung awareness campaign ka ayongzüka liasü.

Yimti nung mopung majungba tebilemstü aser mopung müreka alitsü asoshi tapet yimyatem amshitsü awareness agütsütsü nükjidong nung iba sentong ya ayongzüka liasü.

Kezhaleu Hesso, Vice Principal, DGC ajanga tarur pela agizüka o jembia sentong tenzü aser iba sentong nung shilem agiba atema tongtipang nisungtem, aser kaketshirtem dang pelaba lemsatepa liasü.

Iba sülen Dr. Hannah Tia, Assistant Professor, Department of Sociology ajanga sarasadem aser BA 3rd Semester nung azünger Nyamnyei Konyak-i Green Campus Committee ajanga inyaka aruba maparen balala

indang osang agüja liasü. Iba committee ajanga college campus nung süngdong-lidong anepaluba, jana-reja ketdangsüba aser campus telungzüka nung awareness campaigns ayongzüka indang ashi

Deputy Commissioner, Dimapur, Dr. Tinojongshi Chang-i iba sentong nung jembidang National Clean Air Programme (NCAP) koda tongtipang aser mopung menena akuba tebilemstü koktetsü asoshi komala mapa inyaktsü, item onüktem lemsatepa liasü.

Sorkaria mopung menena ajemtsü asoshi maparen balala inyaker ta pai ashi aser lanurtem dang tongti shilem agitsü ayongzüka liasü.

Iba sentong nung menden aser EAC, Dimapur, Imlijungla Lemtur-i melepzüng o jembia mezüng shilem sentong tembanga liasü.

Iba sülen libajen temürekba aser tajungba kumdaktsütsü asoshi temaitsü ka ama Campus tejenba nung Ficus süngdong asem tema liasü.

Mokokchung Police-i nisung ka apu

Mokokchung, August/Luroi 30 (TYO): Mokokchung Police-i routine checking aoba mapang August 29, 2024 nü Watiyongpang Check Gate nung Pick-up Truck No.AS 11DC 7276 nung Apcores (cough Syrup) 320 bena aliba apu.

Iba Apcores (cough Syrup) ya arishi kum 31 tain MD. Fardous Alom Mazumder (S/o Tayab Ali Mazumder Village-Karaikandi, Cachar, Assam P/ Add Changtongya Town PO/ PS Changtongya, Mokokchung) ajanga bener aruya aliba ngutet.

MD. Fardous Alom Mazumder ya Criminal Case Vide Tuli Police Station Case No. 0010/2024U/S 22(c) NDPS Act dak ajemdaker apu aser pa anema ken o benoka bushitsüngdang agidagi ta Mokokchung Police ajanga sangdong ka nung metetdaksü.

**GOVERNMENT OF NAGALAND
DIRECTORATE OF WOMEN RESOURCE DEVELOPMENT
NAGALAND, KOHIMA.**

NO.DWRD/DEV/MTC-4/2021/ Dated Kohima, the **Aug.** 2024

Advertisement

The Department of Women Resource Development invites female applicants who are willing to undergo 3 (three) months Training Course in the Trade of Hairstyling during 2024-25 at Multi Training Centre (MTC) Kohima.

Hairstyling : (under MTC Kohima)

1	Course Duration	3 Months
2	Eligibility Criteria	Class X Passed Age : 18-35 (as on 1 st July 2024)
3	Intake capacity of Trainees	5 (five)

NB: 1. Last Date of Submission of Applicants (First come First Basis) : 10th Sept. 2024
 2. Date of Interview : 12th Sept. 2024
 3. Time for Interview : 10:30 AM onwards
 4. Venue for Interview at Directorate Office , Kohima(Bayavü Hill)

Applications addressed to the Director, Women Resource Development in plain paper stating bio-data, 2 (two) passport size photos, Self-attested copies of the relevant marksheet, birth certificate ST/SC certificate and any other relevant documents are to be submitted.

Sd/-
(VILONE SAKHRIE)
Director

**GOVERNMENT OF NAGALAND
DIRECTORATE OF TECHNICAL EDUCATION
KOHIMA:NAGALAND**

NO.DTE/CON-IST/1/2024/ Dt. Kohima, the **th** August, 2024.

NOTIFICATION

Pursuant to Govt. Administrative Approval NO.HTE/1-26/2-21/1383 Dt. 28th August, 2024, the interested candidates are informed that the Department of Technical Education will be conducting counseling on the courses mentioned below for studies under Yamuna Group of Institutions, Haryana on 2nd September, 2024 in the conference Hall of the Directorate of Technical Education from 10:00 A.M. onwards. BDS candidates are also advised to bring their NEET-UG 2024 Score Card.

Sl. No.	Name of Course	Seats Offered		Actual Fee without Scholarship	Fee after Scholarship, Nominated through Dir. of Technical Education
		1 st Year	Lateral Entry		
1.	Bachelor of Dental Science	25	Nil	H 18,06,835/-	H 9,80,000/-
2.	Computer Science Engineering	15	25	H 2,92,000/-	H 2,50,000/-
3.	Civil Engineering	30	25	- do -	- do -
4.	Electronics & Communication Engineering	30	Nil	- do -	- do -
5.	Mechanical Engineering	30	25	- do -	- do -
6.	Electrical Engineering	30	25	- do -	- do -

(Er. VIPULHOU LHOUNGU)
Director

Seiyhama nung 3rd Organic Naga Mircha Festival alitsü

Kohima, Luroi/August 30 (TYO): Kohima district kübok Seiyhama Village Council ajanga Cultural hall, Seiyhama nung September 6, 2024 anepdang 10:00 ako nungi tenzüka 3rd Organic King Chilli - Naga Mircha Festival 2024 ayongzüksü sentong lir.

Iba sentong nung Director, Horticulture Department, Meyasashi sentong akhumdong ama adentsü.

Osangbener den jembidang iba benjong ayongba committee indang tongti zülur Savio Metha-i ashiba agi, iba benjong nung king chilly takong, tajem, aoyi ama tongr aliba, pickle yanglua aliba aser organic aonsotsü aser süngjanglijang ayoktsü.

Ano market dang nungi jenjang tajemba nung tin box nung sepa aliba King chilli angutsü, ta pai ashi.

Iba benjong nung chiyongtsü ayokba stall lapoka alitsü aser sentong nung adener temi

Seiyhama village indang chiyongtsü chidangtsü maongka angutsü. Iba benjong nung king chilli achiba, bamboo walk, bamboo climbing, war cry aser lijak jang khashishiba nunger alitsü.

Tetoktepba ya ajak asoshi alitsü aser takoker nem senpet agütsütsü ta benjong ayongeri metetdaksü.

King chilly timtiba züsenteter aser tajungtiba züsenteter nema senpet agütsütsü, ta Metha-i ashi.

Taküm iba benjong nung king chilly seret 2500 shi amshitsü imlar, ta sentong ayongeri ashi.

Iba yimtsüng nung kilen 157 shi nung king chilly lu ayimer, ta parnoki ashi.

2024 kum iba yimtsüng nung king chilly seret 14000 shi onga revenue nung sen 60 lakhs shi angutsü teimla lir.

Seiyhama village ya Northern Angami region nung yimtsüng tatembangba aser Rengma kin den arütsüa lir aser iba yimtsüng nung nisung 1200 shi lir.

AH & VS-i kum ka Paravet Certificate course atema metetdaksü

Dimapur, Luroi/August 27 (TYO): College of Veterinary Science & Animal Husbandry, Central Agricultural University, Selesih, Aizawl, Mizoram ajanga kum paid Paravet Certificate course October ita nungi tenzüksü, ta sangdong ka ajanga metetdaksü.

Iba course ajanga Basics of Veterinary Anatomy, Veterinary Physiology, Animal Husbandry, Basics of Laboratory Techniques, Elementary Knowledge of Pharmacy, Basics of Meat & Milk hygiene, Animal Breeding, Basic of Veterinary Medicine, Basic of Veterinary Surgery, Introduction to Veterinary Extension, Animal Welfare, Care of Wild Animals

and Administration amala theory aser practical yimyatem awajemtsü.

Iba course agitsü atema minimum qualification ya science stream (English, Mathematics/Biology, Physics and Chemistry) nung Class 12 renemer alitsüla.

Course atema application ya September 30, 2024 tashi agizüksü aser course fee aser hostel fee dener course fee ya sen 3,01,140 alitsü.

Jangra aliba candidate temi Email: cvscaizawl@gmail.com Cvsc dean@vahoo.co.in, www.www.cvscauzawLedu.in, Tel: (0389) 2362908 ajanga tongteprateptsü akok, ta sangdong ajanga ashi.



August 30, 2024 nü Gujarat kübok Vadodara nung tüzümsünga alidak tebur kati tetsür ka talongsü ka nung nonger aodang tangokba noksa nung angur.

Arabian Sea nung cyclone Asna tenteta Gujarat kongshir: IMD

New Delhi, August 30 (Agencies): Arabian Sea nung yipru mopung agi cyclone Asna tentetba ajanga Gujarat nung tzunglu sashia arudar, ta Hokolbarnü India Meteorological Department (IMD)-i metetdaksü.

1976 küm sülenbo tang mezüing Arabian Sea nung iba ya cyclonic yipru tenteter. Asna nungja ya Pakistan-i agütsüba nungja lir.

1891 küm nungi tenzüka 2023 küm tashi nung Arabian Sea nung cyclonic yipru asemben dang tenteta liasü, aser itemji 1976, 1964 aser 1944 kümtem nung liasü, ta IMD-i metetdaksü.

1976 küm cyclone ji Odisha nung tentetba sülen Arabian

Sea-i ao aser Oman tüzüymkümlen Arabian Sea nung süngjema liasü. 1944 küm cyclone ji Arabian Sea-i aoba sülen süngjema liasü. 1964 küm South Gujarat tüzüymkümlen cyclone tentetba sülen mapang tatsüka tsüingda tüzüymkümlen anasa süngjema liasü.

Tesüiba ghonda 6 tsüingda Kachchh tüzüymkümlen, Pakistan kübok tesem kar aser northeast Arabian Sea nung cyclone Asna ji ghonda ka nung kilometer 6 kera ogo aser 11:30 ako meta kasa region nung Bhuj (Gujarat) nungi kilometer 190 pilar liasü, ta IMD-i metetdaksü.

Cyclone ji maneni west-northwest tsütsüleni northeast Arabian Sea leni aotsü aser

taruba anogo ana tsüingda India nunger tüzüymkümlen nungi pilatsü, ta weather department-i metetdaksü.

India Meteorological Department (IMD)-i tekümdangtsü osang metetdaksüba sülen Gujarat kübok Kutch District Collector, Amit Arora-i Abdasa, Mandvi aser Lakhpata talukas nung azüki mesüra ki tamajung nung alirtem dang school kitem, tekülem kitem mesüra tanga kiojen nung jenoka atatsü metetdaksüogo.

Brihostibar aonung nungi Gujarat Chief Minister Bhupendra Patel, Gandhinagar nung aliba State Emergency Operations Centre tonga oa tensa asadangdar.

Taruba ita PM Modi-i Brunei aser Singapore na semdangtsü

New Delhi, Luroi/August 30 (Agencies): September ita tetenzüklen Ato kilonser, Narendra Modi-i Brunei aser Singapore na semdangtsü, ta Hokolbarnü ministry of external affairs (MEA) otongdar, Randhir Jaiswal-i metetdaksü.

September 3-4 anogotem nung Modi-i Brunei semdangtsü aser ibaji India nunger Ato kilonser kati tang mezüing Brunei semdangtsü, ta Jaiswal-i metetdaksü.

Brunei Sultan, Haji Hassanal Bolkiahi jaokba nung ajemdaker Modi-i par linük semdangtsü.

Hokolbarnü New Delhi nung osangbenertem den jembidang MEA otongdari, "Sultan Haji Hassanal Bolkiahi-jaokba nung

ajemdaker Ato kilonser Narendra Modi-i September 3-4 anogotem nung Brunei Darussalam semdangtsü, aser ibaji tang mezüing India nunger Ato kilonser kati Brunei semdangtsü asütsü," ta metetdaksü.

Jaiswal-isa, India aser Brunei na tsüingda asalentong tesendaktep yangluba sülen küm 40 ajungba küm Modi-i Brunei semdangtsü, ta ashi.

Brunei semdangba sülen September 4-5 anogotem nung Modi-i Singapore semdangtsü. Singapore Ato kilonser, Lawrence Wong-i Modi jaoka liasü.

"Singapore semdangba mapang nung sentong aika agütsü aser onoki kobi melii

sangdong ka ajanga item sentong metetdaksütsü," ta Jaiswal-i ashi.

2buba India-Singapore Ministerial Dialogue (ISMR) senden amenba sülen mapang tatsüka tsüingda Modi-i Singapore semdangtsü. ISMR senden August 26 nü agiogo aser iba senden nungji Union Minister tem- Nirmala Sitharaman, S Jaishankar, Piyush Goyal aser Ashwini Vaishnaw nungeri shilem agia aden.

Iba senden nungji India aser Singapore nati digital, skill development, sustainability, healthcare, connectivity aser advanced manufacturing densema sector aika nung linük ana tsüingda amalitepa inyaksü asoshi lenirtemi o lemtepa liasü.

Doctor tem shilem 34-ibo aonung duty inyaksü tsübur: IMA

New Delhi, August 30 (Agencies): IMA study ka ajanga, doctor tem shilem 34-ibo aonung duty inyaksü tsübur aser parnok teimbaka tetsürtem lir ta bushitetogo, ta metetdaksü.

Ano doctor tem karibo pei taküm kümzüksü atema raraba hadir alitsü nungdaker, ta ashi.

Aonung duty atartem shilem 45 bo 'duty room' agi matar ta parnokki ashi.

Indian Medical Association (IMA)-i iba survey ya online ajanga agia liasü.

Tawa Kolkata nung aliba RG Kar Medical College & Hospital nung doctor tetsür ka tashiyim amshia raksatsür tepsetba anema linük tesem ajaklen longkak aitba mapang ka nung IMA-i iba survey ya agiogo.

Iba survey nung doctor temi telangzüba 3,885 agütsüba sülen Research Cell, Kerala State IMA Chairman, Dr Rajeev Jayadevan-i aniba team-i iba survey osang metetdaksü. IMA indang Kerala Medical Journal October 2024 issue nung iba report sangdongtsü atema agizükogo.

State 22 nungi doctor temi iba survey nung shilem agi aser shilem agirtem shilem 85 bo arrshi küm 35 ser tekübokpurtem liasü.

"Doctor tem aikati tsübur (shilem 24.1) mesüra kanga

tsübur (shilem 11.4), aser ibaji doctor tem shilem asemsü nungi shilem katibo (1/3rd) tsübuba lir. Tsüburtemji teimbaka tetsürtem liasü," ta iba survey ajanga bushitet.

Talisa arrshi küm 20-30 tsüingdapur doctor temi kanga tetsübuba aser parnok teimbaka interns aser postgraduates liasü.

Aonung duty inyaker doctor tem shilem 45 bo duty room agi matar, anungji parnok aikati aonung duty inyaksü tsübur, ta kasa survey ajanga bushitet.

Hospital tem nung duty room agi meperir, kishi nung dala majung mesüra duty room nung bathroom mali. "Ano duty room shilem 53 shibo ward/casualty area nungi kanga pilar," ta kasa survey ajanga bushitet.

Survey nung shilem agirtemisa hospital nung security sepai tali lemzüksütsüla, CCTV camera peria inoktsüla, light peria inoktsüla, Central Protection Act (CPA) benoktsüla, alarm inoktsüla aser duty rooms peria agütsütsü nungdak, ta lemsatetep.

"Online survey ya India tesem ajaklen nija aser sorkar hospital naprongla nung inyaker doctor tem dangi yoka Google form ka ajanga agi aser ghonda 24 tsüingda telangzüba 3,885 angu," ta Dr Jayadevan-i metetdaksü.



August 30, 2024 nü Ranchi nung taoba mapang Jharkhand nung Chief Minister aser JMM lenir, Champai Soren-i Bharatiya Janata Party (BJP) nung adendang tangokba noksa nung angur. Kasa noksa nung Union Minister, Shivraj Singh Chouhan-a angur.

Jharkhand nung taoba CM, Champai Soren-i BJP nung aden

New Delhi, August 30 (Agencies): Hokolbarnü taoba mapang Jharkhand nung Chief Minister, Champai Soren-i Bharatiya Janata Party (BJP) nung denogo.

Anogo ana tejaklen taoba CM aser Jharkhand Mukti Morcha (JMM) nungi Soren-i party nungi anen aser pai Jharkhand atema BJP nung adentsü telemtetba agiogo, ta metetdakja liasü.

Hokolbarnü Ranchi nung Soren-i BJP nung adenba sentong nungji Union Minister Shivraj Singh Chouhan aser Assam Chief Minister Himanta Biswa Sarma na densema lenirtem aika liasü.

Assam Chief Minister Hemant Biswa Sarma-i New Delhi nung Home Minister Amit Shah ajuruba sülen Sarma-i Soren BJP nung adentsü, ta sangdonga liasü.

"Jharkhand nung taoba Chief Minister aser asen linük nung Adivasi lenir, @ChampaiSoren-i Union Home Minister @AmitShah ajuruogo. August 30 nü Ranchi nung pai official süa @BJP4India nung adentsü," ta Sarma-i X ajanga metetdakja liasü.

Tamalen Soren-i, tribal maitsü kümzüksü atema pai BJP nung adentsü, ta metetdakja liasü.



Shambhu aser Khanauri arrtsülen aluyimertemi longkak ait tenzüka sülen August 30, 2024 nü anogo 200 jungogo. Aluyimertemi taküm February 13 nungi tenzüka longkak aita sorkar dang Minimum Support Price (MSP) densema takhangba balala agütsür.



TIR YIMYIM YIMOBILEM (EDITORIAL)

DIMAPUR

KÜPTOKNÜ

LUROI 31, 2024

Temeim lu

Asenok dak temeim alitsüla ta jembiba ya asen asoshi masü saka timtem mapang tangar yaritsü asoshi nüngdakba indang jembir. Atangji, temeim mapa yabo teti ajak nung nüngdaker saka ano timtema alidak aser timtemba mapangsa tenüngdakba lir. Aji oda, asen sobaliba nunga kibong kar nung shilumanem agi tonger alu meinyaktet timtemba ngura adianu kinunger, kidang kiyonger aser yimtsür yimertemi pei chitem tema bener oa angati nebo agi par luji koka inyaktsür. Kasaji kitsük-kirong, asü-ama aser alima lendong nunga temeim agi kati ka yaritepbaji asen yimsü aser sobaliba liasü. Iba temeim yimsü aser sobalibaji asenok Khristan kümer külenang ano tejangjaba, tuluba aser tajungba tesem aika nung inyakba angur. Item rongnungji tang ama asen lima ajaklen anentsü alua gari lenmang ajak nembanger ainlen jajartem tadongtsü ka metongtet len tom nung amang agi sangwa küma aser sangwa agi amang küma chiyonga ajemdaka maka timtemba mapang, talisa taoba mapang iba yimobilem nung lemsatepba ama Kohima aser Dimapur na tsüngda Mezoma nunger lanurtemi süisüpongertem ajak nem angati tzü aser amtsük den süngo tajung renema jemdaktsüba aser tang yashi yakanü asen lima nunga Mokokchung-Tuensang lenmang nung Tzüla apu anasa lenmang nung anentsü tulu aluba agi, gari ajanga mesenzüteti gari tulu aser tila nung jajartem ajak ayatzüra agi timtema aliba reprangteta Longsa nunger tebu tedi tajungtemi anir temeim aketba kibongtemi angati soruchioka bener oa pei ki metongtet len tom nung timtema alirtem ajak chiyongdaktsüba mapaji akhidang sü achiba mapa danga tuluba aser tanü Christmas benjong agütsüba danga tajungba temeim mapa tajung tulu inyakogo ta tenük nungi tepela nüktzua alua pelaa bilemer. Iba ama temeim yabo kenyongi balaka, pei akaba agi inyakba temeim mapa dang nungi taoba aser tuluba temeim mapa ka lir. Iba yagi temeim mapa inyaker kibong aser yimer nem dang masü saka pei kin aser nübortem ajak nem tenüng tajung bener arutsür. Iba ama mapa jagi tesem ajaklen pei kin nübortem pi tsüngdang tejak angüma atuteta nümadangdanga litettsü. Aji oda, iba ama asenok rongnung nisung kari tesem kar nung timtemer reprangteta temeim mapa inyakba ajanga asen nübortem tasü itdaktsür aser ano kasa temeim mapa inyaktsü shisa tenük aser tangatetba lenmang tuluba lapoktsür. Temeim mapa yabo meyipa angutsü kecha mebilemi aser meimlai inyakba mapa ka lir, aji Laishiba nung ashi ama, asen chiyongtsü tzü manung proka yutsü amai dang lir. Ajisüaka, alima nung Tsüngremer inyakyim ka lir, aji agi kechi aseni prok, tzü nunga sang, ali nunga sang, aji asenisa arotsü. Aji oda, temeim mapa inyaknertem asoshibo meyipa magütsütetba timtemba purtem timtema lia ajurubaji temeim sayutsü mapang tajungtiba aser temeim mapa inyaktsü tesem tajungtiba asütsü. Kenü anogo nisung kati Tsüngrem dang temeim aketba mulungjang meshi aser temeim mapa inyaktsü tashi kua ta sarasadem aser sarasademzükli pa kimai alu nungbo, kimaji meshimetsür ka nokdaka liasü, ajisüaka pai temeim mapa inyaktsü melen jashir meshimetsür nemji kecha magütsüi meindok. Ashi, Tsüngremibo aji pa nem temeim mapa inyaktsüba tesem aser tashi agütsüba mapang ka liasü. Yangji pa tamakok angu. Iba amaji, ashiko, asenok taküm nunga ataloker alitsü. Asenoki temeim mapa ya timmatemer aser asen den jungtepertem den dang inyakteptsü amai bilemer. Aji oda, benjongbentsü nung shijep aser amtsük amala sempettem agütsütepba ya asenoki temeim mapa inyaker amai bilemer, ajisüaka itemji temeim mapa masü sobaliba mapatem lir. Itemji bendangteta aser Tsüngremi asen dang angati meimba temeim angateta asenoki temeim mapa inyaktsü jangrara, kongsa nisungtem timtem aser shisabolu nung lir, aji asenok asoshi temeim lu asütsü.

OLEMSABANG

Nagaland Liquor Total Prohibition Act 1989, aser iba Wadang nung Asenok shilem

C. Walu Walling

(Yashi adok nungi...)

Kinük ajaklen nungi iba Act ya agientsüla ta ola adokba mapang, saka mekümdangra iba Act yagi Naga nunger ajak meyoktsü kecha menua mali. NBCC nung adenba Mungdangtemi den ano aser Christian Forum lokti ajaki NLTP Act 1989ji magientsüla ta ola adokbaji Nagaland sorkari tenük amur aser mangashi ama dangbo meyutsütettsü.

Süra arogoi iba khuret ya state sorkar den küm 30 atema tangatettepba ka zülua yur (MOU) Nagaland telungi aitba süngkhüm ajakji anüktsüsa itasen peria agütsür arogo nütsüngtem yutettsü asü? aser parnok nemji Nagaland Police-i security peria agütsütsüla. Kechiaser tanü asenok putu ya balaka ta angateta sorkar daksa metaloker lira osasren lenir ishika dangsa mejungketer anentsü Anungji Mungdangtem kübok arogotemi iba khuret ya belenzüka bentetra iba jagi ang nübortem tebilembaji tongtettsü.

Tanabuba nung tang tashi Dimapur- Kohima lenmanga yapoka oliorar mesenzütetba tebilemetsü indangbo tawa Nagaland Assembly nung süoki ia mejembir, saka NLTP Act. 1989 bo agiendi ta jembiba nungji lenirtem dak nübortem tamang katetdi ma? English nunger shin o ka nung "Roads are the symbol of a Nation Development" ta ashibaji Nagaland koba district nungbo ataloka osaren lenirtem inyaka ali. NLTP Act. 1989 aginra state revenue crore aika arutsü ta jembibaji lenirtem pocket nung dang atemtsü, saka sorkar senbongibo ishika dang aita sayutsü ta ajaki meteta kar.

Tasembuba nung (ibai züluba atema kü dang tai tokang), Nagalima kinük ajaklen tetsürtem teküp ayokba ya odang yutsütsü asü sorkari langkabo inyaktsü tebilemba ali. Joko Tenemozü benjong Khisama nung tenzüker küm 25 taküm ajungtsü, iba tenemozü benjong nung tetsür kwika teküp ayokba agi manger mesangwa nung takar kwika akümer ta bilemer? Nagaland sorkari teküp ayokbaji ozüng yanglura parnok nungi ang ita shia sen aika angutsü masü no! Kechiba ochi meinyaktettsüsa Nagalima yamai telungi ludaktsür?

Nagalima nung lanur atema sorkari sentong tasen kechisa inyaka ali züngdangtepdi arung. 1970's mapang Nagaland Sugar Mills, Dimapur nung lapok, Tzüdikong nung Nagaland Pulp and Paper Mills, aser Tizit nung Ply Wood Factory lapoka Naga nunger aika item Mills nungji mapa inyakba ngua aruogo. Saka tangbo item ajak shibanga yur tanü Naga nunger MLA 60 ji kechi dang ajia menteper?

Pezübuba nung India nung state ajak pei pei High Court nung obendangertem shimteta yur ken-o ajak bendangteper, saka Nagaland sorkarbo küm paipikati High Court ki merenemtetbaji kechi tai ajanga merenemteter ta süngmangseta repranger. English nunger shin o ka nung "bound foolish penny wise" ta ashiba kürak tanü Nagaland sorkari jembiba nungji shibaibo tamang katettsü.

Adianutem! Naga nunger atemabo YI ji atakatempa tajemtsü! Anungji shirnoki NLTP Act 1989 agientsüla ta jembidir Naga arogoi atakatembaji item dak kaotsü ta angatetang. Anungji arung asen tsüraburtem tamang senmanger tajung kaka asütsü ajaki merangdi. Tsüngremi iba ocet azüngertem moajang!

- Yimozülur dangi-

Tir Yimyim adok nung lipok otsü aser Aotsür sübotsü aser Teptsü Article indang zülü nong Aotsür Aori ken mejemtsü aser ken atentsü angazükklaji "AYONGSHI Jamitsür" liasü ta ni züngshi "SENTI NUKJANG" kaket I.Temjen Jamir D.S.P Mokokchung. Aotsür dak sempet tajung alibaji ni kanga junga belem aser pela. Iba indangji ni zülusem. Saka aji shidak mesüra otsü tejanga meteter nongi angazüktsü mepeshir.

Mrs. Meyisongla
Rtd. Deputy Director
Nursing Nagaland, Kohima

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Goa nung Khristan kati mezüng CAA kübok senso certificate nguogo



Pakistan nunger Khristan, Joseph Francis Pereira-i Goa Chief Minister, Pramod Sawant (tiyong) ket nungi linük senso certificate agizükdang tangokba noksa nung angur.

Panaji, Luroi/August 30

(Agencies): Goa nung state nung Citizenship Amendment Act (CAA) ozüng kübok mezüng India senso certificate angusangji Pakistan nunger Khristan, Joseph Francis A. Pereira kümogo.

Bodhbarnü Goa yimtiba, Panaji nung Goa Chief Minister, Pramod Sawant-i Joseph Francis Pereira nem senso certificate agütsü.

Pereira ya tang South Goa kübok Cansaulim nung alir.

Sorkari CAA agizükba atema pai Ato kilonser Narendra Modi aser Union Home Minister Amit Shah na

nem tenüngsang agütsü. Arrshi küm 78, Pereira-i, "Linük senso atema temepishiba agütsüba sülen ita ka tsüngda temepishiba agizükogo. CAA agizükba atema ni Ato kilonser Narendra Modi aser Home Minister Amit Shah na dang kanga pelar," ta metetdaksü.

Pereira ya küm 37 tashi Bahrain nung mapa inyaka aruba sülen 2013 küm anisüngzüka liasü. Pa aser pa kinüngtsü, Martha Pereira na India-i aruba sülen Goa nung jenoka liasü.

Pa kinüngtsüi, "Küna kibong kümli nungi linük senso

atema temepishiba agüja liasü saka magizüki aruogo, ajisüaka CAA agizükba sülen June ita nung Joseph-i asentenshir linük senso atema temepishiba agüja liasü. CAA mali asübo tetsükdaksü aika ajurula," ta ashi.

Citizenship Amendment Act ozüng ajanga Bangladesh, Pakistan aser Afghanistan linüktem nung reshikangshi ajanga 2014 küm December 31 anogo tashi nung India-i arua jenoka alir Hindu nungertem, Sikhs, Jains, Khristan, Parsis aser Buddhists nunger nem linük senso meshitsü atema temelaba agütsür.

Evangelicals-i Israel atema sarasademtsüba Tsüngremi langzür: Rosenberg



Joel Rosenberg

August 30, 2024: Israel aser Gaza na tsüngda raraba dak sendakba nung o kanga entepba mapang nung United States-i koba tashika Israel pusemstsüla, ta shisadanger.

Moody Radio indang "Dawn and Steve in the Morning," interview nung All Israel News Editor-in-Chief Joel Rosenberg dang, "Evangelical Khristantem aser tanaben asoba tamangertemi Israel aser Israel nungertem atema sarasademtsütsüla asü?" ta asüngdanga liasü.

Ibaji langzüa Rosenberg-i, "Telangzübaji 'hau' dang masü saka ibaji ozüng ka lir. Tenüngsang Ken 122:6 nung yamai shia lir 'Yirusalem nung yimjung atema sarasademjang'" ta metetdaksü.

Paisa, "Laishiba tekong aika nung Tsüngremi Pa sülen

anidakertem dang linük ajak atema sarasademjang ta shia lir, aser iba nungji Israel-a densema lir. Tsüngremi Israel ya Pai saklokba kin ta ajar," ta metetdaksü.

"Tsüngremi alima dak ranglokbaaji Israel ajanga rangloker," ta Rosenberg-i ashi.

Ajisüaka pai, Israel atema sarasademtsütsübaaji ozüng ka dang masü saka ibaji ajanga mapa inyaker, ta ashi.

"Sarasadem angashiba aser sarasadem langzüba Tsüngrem ka asenoki tenzüker," ta pai ashi.

Paisa Khristantem dang Gaza nung pua alirtem atema maneni sarasademjang, ta mepishi.

Rosenberg-isa tamangertem dang maneni sarasademjang, kechiyong pua alirtem nisung 100 shi tang tashi ongken nung lir, anungji asenoki maneni

sarasademtsü nüngdaker, ta ashi.

Israel intelligence ketdangsertemi ashiba agi, July ita nung Hezbollah senior commander Fuad Shukr tepsetba atema Hezbollah sepaitemi Israel amaktsü renemdar.

Rosenberg-i, "Lebanon nung Iran-i pusemba Hezbollah sepaitemi missile 6,000 shi Northern Israel, Central Israel aser Tel Aviv nung khaloktsütsü renema dang lir," ta ashi.

Paisa tawa Israel-i Hamas aser Hezbollah nungi tongti lenir asem tepsetba metetdaksü.

"Ya kechi ataloker? Nibo item ya Tsüngremi taochi sayuba ataloktsür ama bilemer, kechiyong iba ya tongtibangsüa Israel-i sarasademba agi masü, Israel nunger teimba kati sarasadem masür. Ajisüaka Evangelical Khristantemi Israel atema sarasademtsür aser Tsüngremi sarasademji langzür," ta paisa metetdaksü.

Yihuda nunger dak sendakba nung pai, "Tsüngremi Yihuda nungertem den jembitsü meranger. Asenok ya santem lir saka asenoki sannüker ka lir ta mangatetter. Asenoki sannüker dang nungi talangka pilar nemzür, aser iba nungji lendong keta lir," ta ashi.

"Evangelicals meyrjang aika sarasadem onoki nüngdaker," ta paisa metetdaksü.

ANOGO ABEN TSÜNGREM DEN

Tsüngrem mesükba den putepa

"Kechiaser Tsüngremi mulungba ya, oda nenok temeshitetba" (1 Tesa. 4:3).

Asenok nem agütsüba ozüng alizüngji "Temulung temerük aser mulungsentsü tajung anemsü maliba tamang nungi adokba temeim atema lir" (1 Tim. 1 :5). Tsüngrem mesükba den sütepa melira Tsüngrem leniba item den madentsü.

Laishibai asenok kong alitsüla aser shiba den satitsüla shia mali. Saka külem inyakertem den aser asenok shir den alir parnok den tesendaktep junga alitsü indang Lai nung teperi shia lir (Kol. 3:22-25). Kati ka den sendaktepa alitsü (Kol. 3:1-14) aser kibong nung (Kol. 3:18-21) Tsüngremi mulungba inyaksü. Tetezü Tsüngrem den aser kiyonger den putepa alitsü indang Laishiba nung sayur, "Nai Kibuba ne Tsüngrem ne mulung ajak agi, ne tanela ajak agi aser ne tashi ajak agi meimtsüla... Aser nai ne kiyonger na ama meimtsüla. Item ozüng ana nung ozüng aser ainkar 0 ajak itaka lir" (Mathi 22:37-39).

Laishiba nükjidong ajungaji Tsüngrem den koda sendaktepa alitsü aser kati ka den koda putepa alitsü aji sayur. Asenoki iba Tsüngrem dak amanga inyaker.

Tsüngremi jatetba nisung ka na asütsü mulungtetang. Na alema shingaia na Tsüngremi ajaba nungi nokdangtsü makok. Kibuba, tanü ni Nai ajaba nübu ka süner, Ne den aser ni meketa alirtem den putepa linür ta asenoki shidi.

'Tesüngmangtsü Taochi' ken atenba agi temang nung teyari agütsür

August 30, 2024: Osangtajung ken kakat nung aliba "Tesüngmangtsü Taochi" (Amazing Grace) ken atenba ajanga temelungjang health anema lidaktsür, ta study tasen ka ajanga bushitet.

Medical College of Wisconsin nung research agirtemi iba study agia liasü.

Nisung aikati kanga sapua atenba osangtajung ken 'Tesüngmangtsü Taochi' ken atenba ajanga kanga teintet sensotem aser temelungjang tashidak keta alirtem dak kongshir asü? ta parnoki bushisüngdanga liasü.

Iba study nung shilem agirtem dang ken pezü- "This Land Is Your Land", "Hey Jude", "Jolene" aser osangtajung ken kakat nung aliba "Tesüngmangtsü Taochi" kentem rongnung ken ana tennang ta asüngdanga liasü. Parnoki shimba ken anaji minute 10 shi tendakja liasü.

Researcher agirtem jagi ken atentsü jakdang aser ken tenzükli temelungjang 'functions' asadanga liasü. Ajioda "Tesüngmangtsü Taochi" ken ajanga tuluba (22.3%) kongshi aser tanabuba kenji "This Land Is Your Land" (10.1%) liasü.

Kasa study ajanga, "Teintet sensotem atema kentenba ya

temang nung teyari agütsüba ka südaktsütsüla," ta metetdaksü. "Tesüngmangtsü Taochi" ken ya 1772 küm taoba mapang alar shibelenka shishilembar, John Newton-i züluba ken lir. Pa ya mapang talangka Atlantic Ocean ajanga alartem shibelener ka liasü, saka tesülen pai tzüyim nung lendong ka ajuruba sülen Khrista agizük.

1500 nungi 1867 küm tsüngda (küm 367) Africa nunger million 13 shi pua North Atlantic Ocean ajanga Europe aser America nunger rongtem nung shibelenka liasü. John Newton-a Atlantic Slave Trader ka aser alartem shibelenka rong ka nung Captain liasü.

1748 küm tzüyim nung yipru tesashi ka ajurudangbo Newton-i Tsüngrem dang pa aser rong kümzükang ta sarasadema liasü, ajioda pa iba lendong nungjagi kümzük aser pai Khrista agizük.

Küm 24 shi lir 1772 küm pai 'Amazing Grace' ken ya züluba liasü.

"Amazing Grace" kenjang ya John Newton-i taküm nung mapa tamajung aika inyaka liaka pai Tsüngrem taochi anguba otsü nung ajemdaker züluba ken lir.

Tanü tashi iba osangtajung ken ya Khristan aikati kanga sapua atener.

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Tamasüba

(adv) kodanga masüba (immortality)

* Tamasüba kotak lima nung asenok alitsü.

Tamatamar

(adv) ratamata, tebangka, jerapera mali (confusing, dumb)

* Onok arem nung lenmang mangu tamatamar aküm.

OLONG PAITEP # 6910

1		2				3			4
								5	
6									
					7				
		8							
								9	
	10			11					12
	13								
						14			
15									
			16						

TIPILEN

- 2. Tejembinü - 6
- 5. Iba oset ya ajaki aginer - 3
- 6. Aou tapu ka - 5
- 7. Prangpong agi tepset - 5
- 8. Temokok tsünglanglen - 5
- 11. Langtem - 5
- 13. Süngdong tatembang - 5
- 14. _ _ _ _ _ sadoka - 5
- 15. Terok nungi adokba - 3
- 16. Tamagitsü nung mapang endok - 6

LANGTSÜNGLEN

- 1. Meshitak - 5
- 2. Anjongmeshi - 6
- 3. Moijing - 5
- 4. _____ aren - 5
- 7. Tezülen - 5
- 9. O bendangdak - 6
- 10. Sensatsü - 5
- 11. Teka amtep - 5
- 12. Tango _____ - 5

OLONG PAITEP # 6909 TELANGZÜBA

TIPILEN:

- 2. Bangsemo, 6. Tiptem, 8. Jen,
- 9. Talila, 11. Aren, 12. Tzübo,
- 14. Alia, 16. Angati, 17. Odi,
- 18. Azü, 19. Sünglang.

LANGTSÜNGLEN:

- 1. Yipten, 3. Nüja, 4. Sangro,
- 5. Milen, 7. Tulu, 10. Laza, 11. Aben,
- 12. Tiyong, 13. Ajizük, 14. Aitsü,
- 15. Tasa, 16. Aina.

NAI-A YA METETTER MA



Assam nung Lakhimpur district nungi arishi küm 4 tanur ka Assam Book of Records nung zülüogo. Ayushree Saikia-i second 77 nung general knowledge questions 43 tashi langzütet aser iba ajanga lai otsü tasen ka yangluogo. La ya Kankan Saikia aser Bhaskari Medhi na jala lir aser Firstcry I ntell tots Beltola Pre-School nung iba otsü yanglutet.

Assam Assembly nung ghonda 2 'Jumma Namaz' anener



Guwahati, August 30, 2024 (Agencies): Assam Assembly-i August 30, 2024, Hokolbarnü Muslim MLA tem atema ghonda 2 "Jumma Namaz" (Friday prayers) agienogo.

Tang nungi Muslim MLA tem nem sarasadentsü atema mapang balaka alakteta magütsüsü.

Assam Legislative Assembly (ALA) Speaker Biswajit Daimary-i iba lemtet

agiba atema pelar ta Assam Chief Minister Himanta Biswa Sarma-i ashi.

"Ghonda 2 Jumma break agienba ajanga Assam Assembly nung mapang senti ta asüba nung temulung agütsür

aser British yimsüsüba mapang tenzüka yutsüba inyakyim ka anener. Muslim League lennir

Syed Saadulla-i 1937 nung iba mapa tenzü. Biswajit Daimary

aser ozü MLA temi iba otsüsütsü lemtet agiba atema pelar" ta CM Sarma-i ashi.

Assam Assembly nung Hokolbarnü ghonda ana "Jumma Namaz" anentsüba ya

Speaker Biswajit Daimary-i aniba Assembly rules committee ajanga lemtet. Iba

ajanga Hokolbar anepdang 11:00 ako nungi anüngdang 1:00 ako tashi break agiba anener.

CBI-i APPSC exam ken o atema tasembuba chargesheet agütsü

Itanagar, August 30, 2024 (Agencies): Central Bureau of Investigation (CBI)-i Arunachal Pradesh Public Service Commission (APPSC) tatidang nung tim masüba ken o atema supplementary chargesheet tasembuba agütsüogo.

Court of Special Judge, CBI Cases, Yupia, Arunachal Pradesh nung parnoki iba chargesheet agütsü.

APPSC-i Assistant Engineer (Civil) mapa atema question paper temai adokba ken o atema iba chargesheet ajanga bushisüngdangba tembanger.

Iba ken o nung tai tonglokja aliri lar jabaso atema tiyongtsü nung inyaker ka nem Rs 5 lakh agütsü. AE (Civil) Examination, 2022 indang questions angutsü atema süpokrem agütsü.

December 8, 2022 nü tiyongtsü nung inyaker aser candidate den nisung 6 anema charge-sheet ka benoka liasü.

Nisung 6 rongnung private coaching institute nung tesayur ka aser APPSC nung taoba Deputy Secretary-cum-Deputy Controller of Examinations dena lir.

CBI-i bushisüngdanga arur January 31, 2023 nung first

supplementary chargesheet aser March 30, 2023 nü second supplementary chargesheet agüja liasü.

Taoba Deputy Controller of Examinations-i tiyongtsü nung inyaker aser tangar den külemi sen aika yong questions agütsüba putet.

Arunachal Pradesh aser Centre sorkartemi tetuyuba agütsüba sülen CBI-i October 26, 2022 nü FIR ka benokba sülen bushisüngdangtsü tenzüka liasü.

2022 küm Assistant Engineer (Civil) examination magidang question paper temai adok ta tai tonglokja liasü.

Naga lennir Heipou Jadonang indang nüngshilung raksatsü

Imphal, August 30, 2024 (Agencies): Manipur kübok Tamenglong district nung Naga nunger tamangba lennir aser political activist Heipou Jadonang indang nüngshilung ka raksatsüogo.

British yimsüsürtemi pa tepsetba sülen küm 93 buba ajungtsü jakdang mejangjaba nisung kari nüngshilung raksatsü.

Iba tatalokba atema police-i ken o ka benokogo aser Haipou Jadonang Death Anniversary Committee (HJDAC)-ia iba ya atalokaka state kübok tesem balala nung sentongtem ayonga agiogo.

Zeliangrong Union (AMN)-i benjung tongtiba Haipou Jadonang Memorial Park, Imphal nung ayongzüka agi.

Ano, Jadonang Park, Tamenglong Headquarters nunga Haipou Jadonang tepseter küm 93 buba ajungba bilemtetbamong ka ayonga agi.

Iba sentong nung Jadonang-i British yimsüsüba anema noktakba aser independent 'Makam Gwangdi' alizüng ayuba indang bilemteta jembi.



Sentong nung tongti tesemdangerji Water Resources and Relief Disaster Management Minister Awangbow Newmai liasü.

Külen HAC Chairman Dinganglung Gangmei, IAS (Retd)-i Function President aser Tamenglong MLA Janghemlung Panmei-i Chief Host ama shilem agi.

Iba sentong nung Minister Awangbow Newmai-i Haipou Jadonang indang kürakyanglu ka sayatsü.

"Jadonang ya mangdang aketba lennir ka lioasü aser pai Naga nunger longjemtsü aser British yimsüsüba anema raratsü ayongzü" ta Newmai-i

o jembidang ashi. Manipur Chief Minister N Biren Singh-ia social media nung Jadonang nem tetushi agütsüba metetdaksüogo.

Coordination Committee (CorCom)-ia Jadonang-i toktsüba senmang tushiba aser Manipur balaka ketdangtsüa alitsü atema raraba indang sangdong ka agütsü.

Heipou Jadonang-i Heraka religious movement tenzüker aser British ketdangtsürtemi pa 1931 nü süngzü agi alenset.

Pa sülen anidaker Rani Gaidinliu-i Jadonang senmang agizüka inyaker aser tanü tashi la ya nüjiso atema rarar ka ta züngshir.

Polio vaccine atema Israel-i rara anena atatsü mulunger

Jerusalem, Luroi/August 30 (Agencies): Tila-tanurtem nem polio vaccine agütsütsü asoshi Israel-i rara anena atatsü mulungogo, ta World Health Organization (WHO) ajanga ashi.

Iba campaign nükjidong ya Gaza Strip tesem balala nung tanur 640,000 shi nem vaccine agütsütsü aser iba maparen Deobarnü tenzütsü, ta WHO ketdangsür Rik Peeperkorn-i ashi.

Iba maparen ya shilem asem lemsar strip indang central, southern aser northern tsütsü inyaktü. Shilem shia anogo asem atema anepdang 6:00 ako aser nikongdang 3:00 ako (par mapang) tsüngta raraba anena atatsü.

Gaza nung küm 25 sülen mezüngbuba polio case menaba sülen ita ter kinü tanur ka temang tesadang marakzüteni kumogo ta UN ketdangsürtemi shir anogo ishika lir iba tezüngzüktep ya agia liasü.

Gaza nung novel oral polio vaccine type 2 (nOPV2) doses 1.26 million lir aser ano yakta doses 400,000 arutsü.

Iba vaccinations mapa ya UN staff aser yangji aliba health workers temi inyaktü. Iba vaccine agütsütsü atema health aser community outreach personnel 2,000 dak tema nem training agütsüogo.

Gaza nung UN odongtar Louise Wateridge-i timtem makai vaccination sentong agitettsü asoshi ceasefire alitsü ayongzüka liasü.

“anüing sünga bomb aser tamakba lia onoki tanur nem vaccine magütsütsü, pei

takum kumzütsü jena aoba tanur nem onoki vaccine magütsütsü,” ta lai Hokulbarnü Raido 4’s Today sentong nung ashi.

“Onoki vaccine agütsütsü merangba mapang military operations kar danga lira onoki tanur nem item vaccine agütsüba nung kongshitsü,” ta lai ashi.

Tan hopta tanurtem nem oral doses ana-na agütsütsü aser hopta pezü lira no kasa vaccine nüngdaksü, ta Wateridge-i ashi.

Gaza telungzüke nung iba virus menashia aoba anendaksütsü atema WHO-i vaccine coverage shilem 90 agütsütsü nükjidong lir.

Iba jenjang tongtettsü atema nüngdakra ano anogo pezünü buba vaccine agütsütsü aser rara anena atatsü atema züngzüktepa lir.

Poliovirus ya kanga kera menatepa aor aser iba virus ya timba kilentzü aser tzü tamajung nungi menar.

Iba yagi temang shilem meshidaki kumdaksür aser marakzüter. Iba tashidak yagi talisa tanur arishi küm pongu tekübok dak kongshir.

Rara metenzükdang Gaza aser occupied West Bank nung immunisation rate ya kanga junga liasü ta WHO-i ashir. 2022 küm polio vaccine coverage ya shilem 99 liasü, saka taoba küm shilem 89 akum ta tang tesüsa sangdongba data ajanga ashir.

Israel mitkari iba tashidak anema sepaitem nem vaccine agütsü tenzükgogo ta July ita shia liasü.

Hamas ketdangsür Basem Naim-ia Gaza Strip nung Palestine nung tanur 650,000 dak tema nem iba mozü agütsütsü aser parnok kumzüka ayutsü atema international organisations den yariteptsü renema lir, ta osangbener dang ashi.

Israel Ato Kilonser Benjamin Netanyahu-i anogo asem-sem rara anena ataba ya ceasefire masü ta ashir.

UK deputy permanent representative to the UN, James Kariuki-ia iba vaccine sentong pelashishia agizüker ta ashi.

“Tang asenoki iba ya mapa kuma inyakba nguner aser nüngdakba ama mozü ya shilem 90 nem agütsütsü asosi mapang peria rara anena atatsüla. Campaign tenzüker tanurtem temeiner maden mozü agitsü arudang parnok ajak kumzüka ayutsüla,” ta pai ashi.

Vaccination campaign nungya tang pua alirtem dendaksütsüla, ta Hostage Families Forum indang odongtar Prof Hagai Levine-i ayongzüka liasü. Iba telok yagi Israel nung pua alirtem chioktsü asoshi mera tali agitsü ajungshir.

Hamas teloki October 7 nü Israel south tsütsü amakdang nisung 1,200 shi tepseter nisung 251 pua bener aoba nung telangzüba agüja Israel-i Gaza nung military campaign tenzüke.

Tang tashinung Gaza nung nisung 40,530 dak tema tepsetogo, ta iba territory nung aliba Hamas meyong health ministry ajanga ashir.

US voter tem lenmang tasenba nung tejakleni aotsü renema lir: Kamala Harris



Washington D.C., Luroi/August 30 (Agencies): US Vice President Kamala Harris tir asoshi nübuyim tenzüker television nung sensaksem tulu mezüngbuba Brehostibarnü alidang, voter tem lenmang tasenba nung tejakleni aotsü aser kaket tapak melentsü renema lir ta ashi aser telemsa adokba atema la den toktepsang Donald Trump tenüng asen.

“Mezüngbuba nung ni inyaktü tongtipangtibaji middle class tashi itshia aser yaritsü atema kechi akok aji inyaktü,” ta lai la indang running mate Minnesota Governor Tim Walz den külemi mener ashi.

“America nübur tejangraba, nükjidong aser mangdang reprangdangra, nüburtem lenmang tasen nung tejakleni aotsü renema lir ama ni bilemer,” ta lai ashi.

“Terasatsüka tesüba küm ter tsüngta America nung yinya aser tashi samadaksütsü agenda benoktsü kanga merangba taoba tir nisung ka lir, aser ibaji ajanga asen linük telemsa adoker,” ta Democrat-i CNN dang ashi.

“Aser nüburtemi yangji kaket tapak meyiptsü renema lir ama bilemer.”

CNN den sensaksemba mapang lai tensa tamajung majurutsü meranger ta aitsüba indang Harris-i jembia aser

September 10 nü Trump den o inteptsü lia la indang nübuyimba yinya yanglshitsü maongka amshia liasü.

Harris dang la indang policy tem melenshia aruba, talisa temelaba makai arütsü alema aitba nung la tangatetba melenshiba indang asüngdang danga liasü. “Kü indang policy aser telemtetba nung tongtipangtibaji, kü tangatetba memelenshiba ya lir,” ta lai langzü.

Trump-i la ajungbena Black (sentsü tanak) kumogo ta jembiba Harris-i züba-züba yutsü, shiba Black aser South Asian temeyoktep lir. La shimtetra lar Cabinet tenzütsü atema lai Republican ka shimtsü ta ashi saka shiba shimtsü ajibo ano melemtet ta ashi.

Reuters/Ipsos poll ka Brehostibarnü sayaba nung Republican Donald Trum dang shilem pezü agi Democrat Kamala Harris jenjang tajungba sayu, aser ibaji ajanga November 5 nü election agitsü lia tatong tiri voters tem rongnung tejangraba tasen agütsüba ajiteter.

July ita tatemlen Reuters/Ipsos poll nung Harris ya taoba tir dang point ka agi temaba liasü aser poll tasenba anogo ti agir Bodhbarnü tembangba nung Harris-i tetsür aser Hispanics nisungtem tali atsür aruba sayur.

Germany-i Afghan nungertem par linüki meyipa yok tenzüker

Berlin, Luroi/August 30 (Agencies): Küm asem tejakdang Afghanistan nung Taliban yimsüsüba arur tang mezüngbuba Afghan nung mapa tamajung inyaba atema aija alirtem par linüki meyipa yokba maparen mezüngbuba inyakogo, ta Germany-i ashir.

Germanü anüelen Solingen jila nung yimtung nung benjong ka alidang nisung asem dak kotari agi atsüngba sülen hopta ka lir iba osang ya angashir.

Iba mapang nisung tepsetba ajanga Germany anokshitsü aser temulung melemi alisang ya arishi küm 26 tain Syrian refugee ka aser par linüki yoktsüba liasü

ta osang temai adokba sülen asylum ozüng atema o intep tenzüka liasü. Ano May ita lendong ka atalokba sülen Afghan nung nisung ka pua liasü.

Germany anüdoklen Deobarnü elections agitsü lia Berlin nung aliba sorkari mera aika sangdonga lir, kong far-right Alternative for Germany jenjang tajungba nung lir.

Pei linüki meyipa yoktsü aliba asylum bushirtem teyari kecha mangutsü aser sentong balala aser public transport nung kotari bener senzütsü memelar, ta minister temi ashir.

(Maneni tapak 8 nung...)

ADMN-13012/1/2017-ADMN

भारत सरकार
1/9254/उत्प्रेषण-पूर्वी क्षेत्र विकास मंत्रालय
उत्प्रेषण-पूर्वी परिषद् सचिवालय
नॉर्थ ईस्ट दिल्ली, शिलांग

GOVERNMENT OF INDIA
MINISTRY OF DEVELOPMENT OF NER
NORTH EASTERN COUNCIL SECRETARIAT
NONGRIM HILLS, SHILLONG - 793003.
Website: <https://necouncil.gov.in>

Date: 13th August, 2024

North Eastern Council Secretariat nung Stenographer Grade – II indang posts 17 atema temsüa aliba officers bushir. Iba ya deputation yinya nung aser pay scale Rs. 5000-150-8000/- (5th CPC)/PB-2 Rs. 9300-34800/- plus Grade Pay Rs. 4600/- (6th CPC) corresponding to pay scale of Rs. 44900-142400/- ((Level 7) of the 7th CPC Pay Matrix. Post indang tejangja yamai alitsü:

1.	Method of Recruitment and Eligibility Criteria	2 nd method By deputation. Officers under the Central Government or State Government or Union Territories or Statutory Organisations holding analogous post or with eight years regular service in post in the scale of Rs. 4000-100-6000 (5 th CPC)/PB-1 Rs. 5,200-20,200/- + GP Rs. 2400/- (6 th CPC) corresponding to pay scale of Rs. 25500 - 81100/- (Level 4) of the 7 th CPC Pay Matrix or equivalent.
2.	Period of deputation and maximum age limit for the post	Period of deputation including period of deputation in another ex-cadre post held immediately preceding this appointment in the same or some other Organization/ Department of the Central Government, shall ordinarily not exceed three years. The maximum age limit for appointment by deputation shall be 'Not exceeding 56 years as on the closing of receipt of applications.
3.	Job requirement/ Duties and Responsibilities of the post	(a) To function as PA to senior officers. (b) Taking shorthand dictation in English and typing in the computer (English). (c) Maintenance of Visitors' Diary, files and dak movement registers of the Officer/ Sector/Section where he/she has been attached. (d) Maintenance of tour details of officer(s) with whom he/she has been attached. (e) Performing any other task assigned to him/her by his/her officer with whom he/she has been attached/Secretary/Deputy Secretary/Director (Admn.) from time to time.

Taa aser deputation indang terms and conditions ya DoPT's O.M. No. 6/8/2009-Estt. (Pay-II) dated 17.06.2010 aser No. 2/11/2017-Estt. (Pay-II) dtd. 24.11.2017 nung mapang shia amend asüba ama alitsü. Employment News nung iba advertisement adoker anogo 60 tsüngta Director (Admin.) atongtsüsa Cadre authorities/Head of Departments temi temsüa aser mulunga alirtem indang application tekeratiba nung forward asütsü ayongzüker. Curriculum Vitae (Annexure-I) aser danga details atema candidates temi NEC website <http://necouncil.gov.in>. nungi download sütettsü. **OFFICE/DEPARTMENT AJANGA APPLICATION FORWARD ASÜDANG APPLICATION/CERTIFICATES DEN ALITSÜTEM**

1. Prescribed format-Annexure II nung application renemer applicati-i meyonngem agütsür aser Cadre/Appointing authority-i countersigned asütsüla.
2. Tesüba küm pongu (5) indang ACRs/APARs attested copy tem page shia Under Secretary to the Govt. of India dang tekübokba masüba mesüra sako office ajanga attested asütsüla.
3. Integrity Certificate.
4. Vigilance Clearance.
5. Cadre Clearance Certificate.
6. Service nung tesüba küm 10 atema major mesüra minor penalty certificate.
7. Service records nung aliba ama applicant-i agütsüba particulars tem repranga shidak dang lir ta ashiba certificate ka.

Temetettsü: Post(s) atema candidate temi apply asüba sülen parnok indang candidature withdraw mesüdaksütsü.

Signed by
Lienmuong S Gangte
(एल.एस. गण्ते) / 13.08.2024 17:13:07
निदेशक (प्रशासन) / Director (Admn.)

CBC 11104/11/0005/2425

ALI TAYOKTSÜ LIR

At Unity Village, 5th Mile Chümoukedima.
5 minutes walkable distance from NH 29
Contact: 8132908804

US Open nung Van de Zandschulp-i Alcaraz tsükdaktsü



New York, Luroi/August 30 (Agencies): ATP world ranking jenjang tasembuba nung alisang Carlos Alcaraz ya US Open round tanabuba nung unseeded Dutchman Botic van de Zandschulp-i tsükdaktsügo.

Alcaraz ya Rod Laver aser Rafael Nadal sülen Open era tenezüker kasa calendar year nung French Open, Wimbledon aser US Open akoker teburtem rongnung tasembuba akumtsü meranga liasü.

Saka Spain nungba ya world number 74 Van de Zandschulp den asaya tenezükdang nungi junga masayateti 6-1, 7-5, 6-4 agi tsük.

Iba asaya nung tamakok ajuruba ajanga Alcaraz ya Grand Slams nung asaya 15 tashi takok nguyonga aruba tatem akumer alitsü.

"Asaya tepiyong ni kasa dang asayatet amai bilemer, aser ibaji match akoktsü teperi masü liasü," ta Alcaraz-i ashi.

"Ball nung junga mezükshi ama bilemer. Ni aiben aibelen asü. Ni asendenshir asayatsü bilemdangbo menur liasü."

Iba asaya nung arishi küm 21 tain Alcaraz-i unforced errors 27 mena aser Van de Zandschulp-i 21 mena.

"Ni bilemba ama masü pai

aibelen kangabo meliasü aser ibaji ajanga ni tera mangmang. Aji ketdangsütsü ni memeteti liasü," ta Alcaraz-i ashi.

August 4 nü Paris Olympics nung Novak Djokovic mokokteti silver angusang Alcaraz ya Flushing Meadows-i maodang anisüngzük talangba nungdaker ta ashi.

Mezüng set akokba mapang Van de Zandschulp-i game ka dak tamakok angu aser iba mapang Arthur Ashe Stadium nung tereprangertem süngmanga ola madoki liasü.

"Ni jembitsü o kecha merateter, kü atema anogo tajung liasü, ta New York nung 2021 küm quarter-finals atongsang Van de Zandschulp-i ashi.

Arishi küm 28 tain Zandschulp ya round tasembuba nung British number one Jack Draper den asayatsü.

Danga asaya ka nung world number one Jannik Sinner-i America nung Alex Michelsen madak 6-4, 6-0, 6-2 agi takok angu, koba taküm pa asoshi takok 50 buba liasü.

Australian Open champion Sinner dak küm tetenzüklen anaben tashi nokdanga aliba mozü putetba sülen pai aibelen mali ta jangjatsür asayamung

mezüngbuba asayar alitsü.

Arishi küm 23 tain Sinner ya round tasembuba nung Australia nung Chris O'Connell den asayatsü.

Külen Russia nung seed pongu buba nung alisang Daniil Medvedev-i Arthur Ashe Stadium nung tereprangertem peladakja Hungary nung Fabian Marozsan madak 6-3, 6-2, 7-6 (7-5) agi akok.

"Tanü asaya ya ni Italian restaurant ka nung lir ama bilem - ola kanga liasü," ta Medvedev-i Louis Armstrong Stadium nungi ashi.

Ano seed tenet buba nung alisang Hubert Hurkacz ya Australia nung Jordan Thompson-i 7-6 (7-2), 6-1, 7-5 agi tsükdaktsü.

Poland nung Hurkacz ya US Open round tanabuba nungi tsükba taküm agi küm pongu buba alitsü.

Ano America nung seed 16 buba nung alisang Seb Korda ya Czech nung Tomas Machac-i 6-4, 6-2, 6-4 agi tsükdakja round tasembuba nung Belgium nung David Goffin den asayatsü.

Seed 24 buba nung alisang France nung Arthur Fils ya world number 143 nung alisang Canada nung Gabriel Diallo-i 7-5, 6-7 (3-7), 6-4, 6-4 agi akok.

Saka Australia nung seed 10 buba nung alisang Alex de Minaur-i Finland nung Otto Virtanen madak 7-5, 6-1, 7-6 (7-3) agi takok ngua round tasembuba nung Britain nung Dan Evans den asayatsü lir.

America nung seed 14 nung alisang Tommy Paul ya 7-5, 6-0, 1-0 agi pa temaba jenjang nung lia Australia nung Max Purcell masayatetsüsa kuma round tasembuba tongogo.

Advisor Keoshu-i Department of YRS Nagaland App semzüktsü



Kohima, Luroi/August 30 (TYO): Advisor, Youth Resources & Sports, S. Keoshu Yimkhiung-i Hokulbarnü Department of Youth Resources & Sports Nagaland App semzükja liasü.

DYRS Conference Hall, Kohima nung App semzüktsüba mapang, iba App tasenba ya ajanga ketdangsür aser staff tem tsüngta tajungba nung amalitepsü tsütsü yaritsü aser department inyakyim tajungba akumtsü imlar, ta Keoshu-i ashi.

Keoshu-i Department nung ketdangsür aser staff ajunga

dang iba App nung register asütsü nenshia ashi.

Lenla balala nung Department aintsü aser ajangzüktsü atema App yangluba asoshi YRS Secretary, Anthony Ngullie-i Department of Youth Resources & Sports indang director aser staff nem tenüngsang agüja liasü.

Pai ketdangsür aser staff tem dang iba App amshia tajangzük agitsü ayongzükta liasü.

Iba sentong nung jembidang YRS Director, Kethosituo Sekhose-ia Advisor Keoshu

lenisüba kübok anogoshi department terenlokba akumer ta ashi.

State nung saisapong tsütsü iba App ya mera tuluka asütsü imlar, ta pai ashi.

Iba App nungya features asem lir, Attendance - ketdangsür aser staff temi mashi mapang iba App ya amshia attendance register asütsü, text report aser noksa amala amshia department nung maparen balala inyakba osang sangdongtsü aser sorkar nungi osangtsüsang balala aruba district officers nem iba App ajanga prokshitsü.

DYRS App ya Google Android system-i certified süogo aser safe security atema Apple indang App Store nunga certify süogo, ta Sekhose-i metetdaksü.

Iba App yanglusang Rishav Sethi-ia September 1 nungi tenzükta ketdangsür aser staff temi iba App amshitsü imlar, ta ashi.

Sepaktakraw World Championship nung state nungi asayar pezü-i shilem agitsü

Dimapur, Luroi/August 30 (TYO): Thailand nung September 1-8, 2024 anogotem asayatsü aliba Sepaktakraw World Championship The 37th Kings Cup nung shilem agitsü asoshi India nungi asayatsü tetsür 15 aser tebur 15 den team coach aser manager tem aotsü.

Yangji tetsür asayar 15 nungi Naga tsür pezü dena oa shilem agitsü.

Nagaland nungi iba team nung Sezovelu Dozo, Rukuvinu

Tsukru, Seyiekhrieno Tapa aser Mongshai alitsü aser Director, Youth Resources & Sports, Kethosituo Sekhose ya Indian Team Manager ama aotsü.

Iba dak sensakba nung Indian Sepaktakraw Federation (STFI) ajanga Indian Team Manager ama Director, Youth Resources & Sports, Sekhose shimba atema pelaba lemsateper, ta Nagaland Sepaktakraw Association (NSTA) ajanga sangdong ka nung ashi.

STATE OSANG :

Tapak 1 nungi...

Longsa lushi süia...

Anentsüh ajanga NH 202 KM 14.00 tesem nung lenmang anembangba ajanga iba lenmang melapok tashi Chare -New Chungliyimti - Meyilong - Longsa - Sewak Gate (Mokokchung) nung anogo ana i.e, August 29-30 gari kecha mesenzü asoshi Tuensang Deputy Commissioner, Lithrongla Tongpi Rutsa-i sangdong ka adokja lir.

Iba osang zülu tashi nung anentsüh yatokba mapabo temer liasü aser khu abenba gari tazüng, bolero aser pick-up tashibo jajateter saka khu bena alir (load) garibo ano mesenzüdaktsü lir, ta yangji

mapa inyaker kar den jembidang ashi.

Mokokchung - Tuensang via Longsa Dikhu lenmang ya Govt.-i temulung magütsüi joko küm talangka sentoka arur, mapang shia Dikhu apu merang raksar, idangji timtem jenti agia Longsa yimdeni department den tongtepratepa nübusa tsüker. Iba lenmang ya Longsa nung atema dang masü Tuensang aser Surhoto range (Zunheboto) nüburttem asoshi taküm lenmang lir. Anungji, sarkari iba lenmang den apu-tem tekaratiba nung reprangtsüla, ta Longsa senso kadi iba osangbener den jembidang metetdaksü.

BENDANGLI OSANG : Tapak 7 nungi...

Germany-i Afghan nungertem par...

Thuringia aser Saxony nung Deobarnü vote agitsüba ajanga federal government tenteta aliba party asem maksü angutsü amai ajiteter, kechiaser polls nung parnok ajak shilem 10 dak tajemba nung lir.

Thuringia nung AfD ya mezüngbuba jenjang ngutettsü amai sayur aser Saxony nung AfD aser CDU jenjang kasasa sayur. Anti-immigration party ya state anaprong nung sorkar kumtettsü jenjang sadema mali, kechiaser danga telok katia AfD yaria sorkar kumtettsü mulunga mali.

Hokulbarnep 7:00 ako sülen Leipzig nungi ayamesoba chartered flight Boeing 787 nungya Afghan nung tebur 28 bena liasü aser Kabul-i ao, ta osangtem ajanga ashir.

"Item ya Afghan nung, aser parnok ajak aibelenertem lir, shirnok Germany nung alitsü temeden maka aser parnok anema deportation orders

agütsür liasü," ta sorkar indang odongtar Steffen Hebestreit-i ashi.

Germany ya Taliban sorkar den tesendaktep meliaka May ita Mannheim nung kotari agi lendong agütsüba sülen ang Afghan aser Syria nung deportation ya mela, ta Chancellor Olaf Scholz-i ashi.

May ita iba lendong nung police ka tepset aser Afghan nung arishi küm 25 tain tebur ka apu.

Taoba Hokulbarnü Solingen lendong nung nisung asem asü aser ti yirua Germany nung nüburttem ain adoktepa liasü.

Arishi küm 26 tain Issa Al H ya nisung tepsetba aser telungpur telok Islamic State den sendaktepa aliba bushisüngdanga liasü.

Syria nungba ya taoba küm Bulgaria-i yoker alitsüba liasü, saka ketdangsür temi pa mongutetba mechi tamakok ajurua liasü.

BIEMDANGANG

"Ajak den tembar asübaji shinga dena tembar masü."